

■ COLUMNA

Da vegnir scuidus

DA BERNARD CATHOMAS

Sa tgi che sa rumantsch dapli, sco quai ch'in slogan da reclama dal 2002 che radiescha fin oz preten- da senza retegrientschas e mussaments scientifics?

En sasez vulev'ins da lez- zas uras mo dir che tgi che sa rumantsch chape- scha il Radio Rumantsch e che tgi che taidla quel sa dapli. Slogans vulan e ston irritar per avoir effect, els sa drizzan a las emoziuns e vulan ch'i vegnia discurrì, pro e contra. Che mintgin lauda ses product sa chape- scha en la reclama da sasez. Il consument critic resta li- ber da pensar tge ch'el vul.

Blers eran lezza giada surstads da las undas che quest slogan subtil e subversiv ha mess en movi- ment. Tantas e tants avevan stuì udir durant onns ed onns ch'il rumantsch saja ina grevezza ed in impedi- ment per vegnir enavant. Leger tuttenina sin placats che l'agen linguatg na saja betg in burdi pesant, ma- bain ina valor supplemen- tara, quai era balsam per l'olma. Minoritads pate- schan magari da sentiments d'inferiuradad. «Tgi che sa rumantsch sa dapli» era ina medischina encunter tals sentiments. E talas medi- schinas valan dapli che quai ch'ins crai.



Ma co statti cun la var- dad dal slogan? La sequenta sgnocca raquinta- da da lez temp a Trin dat in'emprima resposta. In Sursilvan dumonda in da Digg: Pertge discurras ti adina rumantsch? – Fitg simpel: Tudestg sa mintga tabalori.

Ina segunda part da la re- sposta è lezza giada ve- gnida da Grischuns tu- destgs ch'avessan pudì prender il slogan en mal. Insumma betg. Ma ka nit abschritta, dass ier üpis me chönnt, neba Romanisch au no guat tütsch. Diffe- rents politichers chantunals e federals da lingua tude- stga han cità il slogan en lur plets e schizunt scripturs al han gidà a sglar.

Hai er da far cun savair dapli che la regenza grischuna e la delegaziun a Berna han savens ina maio- ritad che sa rumantsch – er sch'il rumantsch fa or

gnanc in quart da la popu- laziun chantunala? E che Rumantschas e Ru- mantschs èn da chattar en buna proporziun en posts da cader in pau dapertut en il chantun ed en Svizra?

Slogans vivan da la pro- vocaziun ed inspire- schan dad imitar: Tgi che sa sursilvan, sa dapli. Tgi che sa tuatschin sa anc da- pli. U er: Tgi che sa ladin sa bler, tgi che sa sursilvan er, tgi che sa rg il pli bler. Ad in inscunter da giuventetg- na aveva la campagna cun- ter aids repartì condoms cun l'inscripziun: Tgi che sa rumantsch,... (il rest na dovr jau betg citar qua).

Jau enconusch paucs au- ters slogans da reclama ch'èn anc suentar decennis virulents, irriteschan ils spierts ed animeschan dis- cussiuns. Ins chapescha quels che vegnan scuidus che Kaspar Jörger da Do- mat, magister e sesent a Ta- vau, da pia memoria, ha creà in slogan cun tala vi- gur ed ha permess – senza pretendar il minim onurari – da duvrar quel ed ir a cor a blers.

Betg mintgin che scriva vegn da formular in slogan cun in coc vardad a moda uschè pregnant che resta fitgada en la memoria e tenta anc suentar 20 onns.